

L. Միրիջանյանի անվան հ. 155 հիմնական դպրոց

## ՀԵՏԱԶՈՏԱԿԱՆ ԱՇԽԱՏԱՆՔ

**Թեմա՝** Հաղորդակցման դերը կրտսեր դպրոցականի անձի զարգացման գործընթացում

**Ուսուցիչ՝** Բաղայան Լիլիա

**Ղեկավար՝** Միրզոյան Թամարա

Երևան 2023

# Բովանդակություն

Ներածություն-----	3
ԳԼՈՒԽ 1. Հաղորդակցումը որպես կրտսեր դպրոցականի դաստիարակության միջոց-----	5
ԳԼՈՒԽ 2. Ճիշտ հաղորդակցվելու առանձնահատկություններն ուսուցիչ-աշակերտ փոխհարաբերություններում-----	9
Եզրակացություն-----	13
Օգտագործված գրականության ցանկ-----	15

## **Ներածություն**

Յուրաքանչյուր մարդու կյանքում կարևորագույն խնդիրներից մեկը մարդկանց հետ ճիշտ հաղորդակցվելն է, շփման մեջ անկաշկանդ լինելը: Որտեղի՞ց է սկսվում մարդու զարգացումը, իհարկե ընտանիքից, շրջապատից և գլխավորը՝ դպրոցից: Երեխաները կարող են դեռ մանկուց չունենալ շփման հետ կապված խնդիրներ, լինել անմիջական և հեշտ հարմարվել միջավայրին, սակայն շատ դեպքերում հանդիպում ենք լրիվ հակառակ իրողությանը, երբ երեխան ինքնամիտ է, դժվար է շփման մեջ մտնում նույնիսկ իր հասակակիցների հետ և առաջին անգամ դպրոց մտնելիս մի շարք դժվարությունների է հանդիպում: Այստեղ շատ կարևոր է ընդգծել ուսուցչի դերը, նա կարող է լինել հենց այն մարդը, որը կփոխի տվյալ երեխայի բնավորությունը, կսովորեցնի նրան շփվել մարդկանց հետ, արտահայտել իր կարծիքը: Հենց այս իմաստով դպրոցը կարող է անկյունաքարային նշանակություն ունենալ նման երեխաների կյանքում:

Ինչ վերաբերում է անմիջական և աշխույժ երեխաներին, ապա նրանք ավելի հեշտությամբ կկարողանան հաղորդակցվել և՛ իրենց ուսուցիչների, և՛ համադասարանցիների հետ: Այս պարագայում էլ ուսուցիչը պետք է ուշադրություն դարձնի նման երեխաների վարքին և դասարանում այնպիսի մթնոլորտ ստեղծի, որ այդ շփումը չանցնի սահմանները, կարգուկանոնը պահպանվի և դասն ընթանա իր բնականոն ընթացքով:

**Ուսումնասիրության առարկան և նպատակը:** Մեր ուսումնասիրության առարկան հաղորդակցման դերն է կրտսեր դպրոցականի անձի զարգացման գործընթացում, իսկ նպատակն է ցույց տալ այն դժվարությունները, որոնք առաջանում են հաղորդակցման ընթացքում և մատնանշել այն հիմնական մեթոդները, որոնցով դասն անցկացնելու դեպքում ուսուցիչը կարող է աշակերտների մեջ սերմանել ճիշտ արժեքներ և արդյունքներ գրանցել:

**Հետազոտության խնդիրները:** Պետք է բացահայտվեն այն հիմնական խնդիրները, որոնք ունենում են հիմնականում կրտսեր

դպրոցականները միմյանց հետ շփման ընթացքում և հնարավորինս ճիշտ ձևերով փորձել նրանց տալ այնպիսի գիտելիքներ, որոնք կօգնեն ճիշտ հաղորդակցվել:

**Արդիականությունը:** Շփումն ու հաղորդակցությունը յուրաքանչյուրի օրվա անբաժանելի մասն են, եթե չկարողացար դրանց առանձնահատկություններին տիրապետել, ապա չես կարողանա քո տեղը գտնել կյանքում և առաջ գնալ: Այժմ բավականին մեծացել է այն երեխաների թիվը, որոնք իրական շփման փոխարեն նախընտրում են օնլայն շփումը, որն էր իր հերթին բերում է ինքնամփոփության և որն էլ կարող է հանգեցնել հոգեբանական լրջագույն խնդիրների: Ուստի այս ամենից խուսափելու համար միակ միջոցը դպրոցն է, այնտեղ գաղափարապես ճիշտ ձևավորվելը: Այս թեման ինչպես նախկինում, այժմ առավել ևս արդիական է և գտնվում է բոլորի ուշադրության կենտրոնում:

Մեր հետազոտական աշխատանքը բաղկացած է ներածությունից, երկու գլխից, եզրակացությունից և օգտագործված գրականության ցանկից:

## **ԳԼՈՒԽ 1. Հաղորդակցումը որպես կրտսեր դպրոցականի դաստիարակության միջոց**

Ուրիշին հասկանալու ամենակարևոր միջոցը նրա հետ շփումն է: Հաղորդակցության միջոցով մարդիկ կազմակերպում են տարբեր տեսակի գործնական և տեսական գործունեություն, փոխանակում են տեղեկատվություն, հասնում են փոխըմբռնման, մշակում գործողությունների համապատասխան ծրագիր և փոխադարձ ազդեցություն են ունենում միմյանց վրա: Հաղորդակցության գործընթացում ձևավորվում, դրսևորվում և իրականացվում են միջանձնային հարաբերությունները<sup>1</sup>:

Մեր ժամանակներում մեծ ուշադրության է արժանանում կրտսեր դպրոցական տարիքը, քանզի այն համարվում է ուսումնական գործունեության առավել պատասխանատու փուլ: Կրտսեր դպրոցական տարիքում առաջատար է դառնում նոր գիտելիքների, ունակությունների և հմտությունների ձեռքբերումը, ինտենսիվորեն զարգանում և փոխվում են ճանաչողական գործընթացները՝ հատկապես մտածողությունը և հաղորդակցման հմտությունները: Կրտսեր դպրոցական տարիքում ձևավորվում են կայուն պահանջմունքներ ու հետաքրքրություններ, համարժեք ինքնազնահատական, զարգանում են ինքնավերահսկողության ու ինքնակարգավորման հմտություններ, իր և այլոց նկատմամբ քննադատական վերաբերմունք:

Կրտսեր դպրոցականների զարգացման մեջ էական նշանակություն ունեն ուսուցիչները և դասերն անցկացնելու նրանց մեթոդները: Աշակերտների դպրոց մտնելու հենց առաջին օրվանից պետք է կարողանալ նրանց հետ ճիշտ հաղորդակցվել, համապատասխան բառեր ընտրել՝ նրանց նոր միջավայրին ադապտացնելու համար: Այդ տարիքում երեխաներն ավելի էմոցիոնալ և խոցելի են, ուստի, եթե նրանց հետ ճիշտ աշխատանք տարվի, ապա նրանց կյանքի հետագա զարգացումն ավելի հեշտ կընթանա: Լինում են տարբեր բնավորությունների տեր երեխաներ,

---

<sup>1</sup> Коноваленко, М. Ю. Теория коммуникации : учебник для бакалавров, Москва, 2023

որոնցից յուրաքանչյուրի հետ պետք է անհատական աշխատանք տանել, դրա համար բացի մանկավարժական գիտելիքները, ուսուցչին անհրաժեշտ են նաև հոգեբանական բավարար հմտություններ: Դասարանում համապատասխան միջավայր ստեղծելը, դասընկերների հետ շփման կազմակերպումը հենց այն սկզբնական գործողություններն են, որոնք պետք է անի ուսուցիչը:

Հաղորդակցման մեջ կարևոր է նաև երեխաների փոխհարաբերություններ կառուցելու կարողությունները դասընկերների հետ: Դա հնարավորություն է տալիս շփման մեջ լինել ակտիվ, չվախենալ, առաջինը սկսել շփումը անձանոթ երեխաների հետ, ուսուցչի հետ: Հաղորդակցական կարողությունների ձևավորման և համագործակցության համար շփումը հանդիսանում է հիմք: Հասակակիցների հետ հաղորդակցումը երեխաներին տալիս է այն, ինչ սկզբունքորեն չի կարող տալ մեծահասակների հետ հաղորդակցությունը:

Կարևոր է ուսուցչի հետ հաղորդակցությունը: Ուսուցչի հետ հաղորդակցումը մեծ ազդեցություն է թողնում կրտսեր դպրոցական աշակերտի վրա: Ուսուցիչը կարող է օգնել երեխային հաղթահարել խնդիրները և դժվարությունները, կարելի է ասել, որ, եթե երեխան վստահելի հարաբերություններ ունի ուսուցչի հետ, ապա կրթության և վարքային խնդիրները կլուծվեն: Ընդհանուր առմամբ տարրական դպրոցի ուսուցիչը մեծ ազդեցություն ունի կրտսեր դպրոցականի անհատականության ձևավորման վրա: Աշակերտի համար կարևորվում են ուսուցչի գովասանքը, գնահատականը, ավելի ուշ հասակակիցների կարծիքն իր անձի վերաբերյալ: Շատ կարևոր է նաև կրտսեր դպրոցականին թույլ տալ արտահայտել իր կարծիքն ու տեսակետն այս կամ այն հարցի վերաբերյալ, քանզի այդ պարագայում նա իրեն ավելի վստահ կզգա և չի վախենա իր սեփական մտքերն արտահայտելուց:

Հաղորդակցման միջոցով ուսուցիչը պետք է այնպիսի արժեքներ սերմանի աշակերտների մեջ, որ նրանք այդ արժեքներով ապրեն իրենց ողջ կյանքում: Շփումն ու հաղորդակցումը մարդուն ուղեկցում են իր ողջ կյանքի ընթացքում և եթե դպրոցից սկսած հաղորդակցման դերը կարևորվի և օգտագործվի հենց դասասենյակից սկսած, ապա տվյալ

աշակերտն իր կյանքի հետագա փուլերում կկարողանա իր տեղը գրավել շրջապատի մեջ և կայուն ապագա ստեղծել: Եթե երեխան գիտելիքի հետ մեկտեղ նաև ունենա ճիշտ հաղորդակցվելու կարողություն, ապա վստահաբար կյանքում իր տեղը կկարողանա գրավել:

Կրտսեր դպրոցական տարիքը բնութագրվում է նրանով, որ երեխան ձեռք է բերում նոր կարգավիճակ՝ նա դառնում է աշակերտ, իսկ առաջատար գործունեությունը խաղից փոխվում է ուսման: Կրթական գործունեությունը սոցիալական նշանակություն ունի և երեխային դնում է նոր դիրքում մեծահասակների և հասակակիցների նկատմամբ, փոխում է նրա ինքնագնահատականը և վերակառուցում հարաբերությունները ընտանիքում<sup>2</sup>:

Ուսումնական գործընթացը, գիտելիքների, հմտությունների, կարողությունների ձեռքբերումը ենթադրում է աշակերտի ինքնակառավարում, ինչը հնարավոր է իրականացնել լավ զարգացած կամաձին ուշադրության դեպքում: Ուսման սկզբնական շրջանում երեխային գրավում է երևույթների միայն արտաքին կողմը, իսկ ուսուցչի դերը կայանում է նրանում, որ պարբերաբար սովորեցնի դիտողականությանը, երևույթների էության ըմբռնմանը, հասկացմանը և այլն<sup>3</sup>: Աշակերտն ուսուցչի հետ հաղորդակցվելու միջոցով և՛ տվյալ առարկայի վերաբերյալ է գիտելիքներ ձեռք բերում, և՛ կարողանում է սովորել ճիշտ հաղորդակցվելու կանոնները, կարևոր է շփումը դասընկերների հետ, որի ընթացքում էլ աշակերտը կարող է շատ բաներ յուրացնել: Ուսուցչի դերը կարևորվում է նաև այն հարցում, որ նա պետք է դասապրոցեսն այնպես կազմակերպի, որ դասարանում առանձնացած աշակերտներ չլինեն: Սա մեծապես կախված է նրանց դասապրոցեսի մեջ ներգրավվելու հարցից, եթե այդ աշակերտները մասնակցեն դասերին, հարցեր տան, այսինքն՝ ինտերակտիվ շփման մեջ լինեն իրենց ուսուցչի ու դասընկերների հետ, ապա հեշտ կլինի նրանց հարմարեցնել միջավայրին և որոշ չափով դուրս բերել ինքնամոտի երեխայի կարգավիճակից:

---

<sup>2</sup> Гони́на О.О. «Психология младшего школьного возраста», Москва, 2020

<sup>3</sup> Ասատրյան Զ. «Տարրական կրթություն մանկավարժություն», Երևան, 2011թ, էջ 35

Կրտսեր դպրոցական տարիքում ինտենսիվ զարգանում և հարստանում է նաև երեխայի խոսքը: Ուսուցիչը կարող է օժանդակել այս գործընթացին՝ ապահովելով հարուստ խոսքային միջավայր, ձևավորել գեղեցիկ խոսքն օգտագործելու պահանջմունք: Այս տարիքում նաև ձևավորվում է գրավոր խոսքը, որը բավականաչափ երկարատև և կամային ճիգեր պահանջող գործունեություն է: Պետք է նշենք, որ երեխայի կրտսեր դպրոցական տարիքին անցումը ընթանում է ճգնաժամային իրավիճակներով, որը կոչվում է 7 տարեկանի ճգնաժամ: Երեխան այս տարիքում սկսում է իմաստավորել սեփական ապրումները, ինչի շնորհիվ փոխվում է նրա վերաբերմունքը սեփական անձի նկատմամբ: Ա. Ն. Լեոնտևը 7 տարեկանի ճգնաժամը բացատրում է նոր առաջատար գործունեությանը և դրանով պայմանավորված նոր սոցիալական հարաբերություններին անցնելու վաղաժամ կամ ուշացած լինելու հանգամանքով, եթե երեխան ժամանակին անցնում է գործունեության նոր տեսակին, այսինքն՝ հոգեբանորեն պատրաստ է լինում նոր գործունեությանը, ճգնաժամն ի հայտ չի գալիս<sup>4</sup>:

Այսպիսով, կարելի է փաստել, որ կրտսեր դպրոցական տարիքում երեխաները հաղորդակցման միջոցով ձեռք են բերում բազում գիտելիքներ, գաղափարապես զարգանում են, առաջնորդվում են հստակ գիտակցված նպատակներով, բարոյական նորմերով և արժեքներով: Այս ամենում իր անկյունաքարային նշանակությունն ունի ուսուցիչը, նրա աշակերտի հետ շփվելու հմտությունները և յուրաքանչյուր աշակերտին առանձնահատուկ ուշադրություն դարձնելու կարողությունը:

Հաղորդակցումն ու շփումը յուրաքանչյուրի կյանքում առաջնային է և հենց այդ հատկանիշների շնորհիվ են մարդիկ կարողանում առաջընթաց ունենալ և հասնել իրենց առջև դրած նպատակներին:

---

<sup>4</sup> Խոլոդյան Ս. Ս. «Անձի զարգացման ճգնաժամային տարիքները»-Երևան: Զանգակ – 97, 2004, 43 էջ



**ԳԼՈՒԽ 2. Ճիշտ հաղորդակցվելու  
առանձնահատկություններն ուսուցիչ-աշակերտ  
փոխհարաբերություններում**

Կրտսեր դպրոցական տարիքի երեխաների հաղորդակցական հմտությունները՝ որպես սոցիալական ադապտացիայի միջոց, համարվում են կրտսեր դպրոցական տարիքի երեխայի հոգեբանական առանձնահատկությունները: Կրտսեր դպրոցական տարիքը տարբեր սեռի երեխաների միջև շփման մշակույթն է, հաղորդակման և խոսքային կարողությունների ձևավորումն է, ուսուցիչ-աշակերտ փոխհարաբերությունների կառուցումն է: Երեխան, դպրոց հաճախելով, շփվելով ուսուցչի և իր հասակակիցների հետ ձևավորում է իր մարդկային հարաբերությունները:

Կրտսեր դպրոցական տարիքը ստեղծում է մեծ հնարավորություններ անձի բարոյական որակների և դրական գծերի ձևավորման համար: Բարոյական վարքի հիմքը դրվում է դպրոցում՝ կրտսեր դպրոցական տարիքում<sup>5</sup>: Յուրաքանչյուր երեխա ունի իր բնավորության առանձնահատկությունները և հարաբերություններ կառուցելիս նրանք հանդես են գալիս մի կողմից որպես ակտիվ, մյուս կողմից որպես պասիվ կողմ: Դպրոց մուտք գործելիս այս երկու բնավորությունները կարող են միմյանց բախվել, այս ամենից խուսափելու համար ուսուցիչը նախ պետք է մանրակրկիտ ուսումնասիրի յուրաքանչյուր աշակերտի բնավորության առանձնահատկությունները, փորձի նրանց հետ շփման ճիշտ ուղիներ գտնել և դասարանում ստեղծի այնպիսի մթնոլորտ, որի դեպքում դասարանի յուրաքանչյուր աշակերտ իրեն կարևորված և հասկացված կզգա, դասարանում բոլորը պետք է լինեն հավասար: Այստեղ ուսուցիչը կարող է գործի դնել նաև մանկավարժի հոգեբանությունը, բարդ բնավորություն ունեցող աշակերտների հետ դասերից դուրս զրույցներ անցկացնել, փորձի նրանց ճիշտ հարաբերվելու ուղիները ցույց տալ և դասարանում ստեղծի համերաշխության մթնոլորտ:

Օրինակ՝ դասարանը բաժանել խմբերի և յուրաքանչյուր խմբում ներառել ինքնամիտի և ակտիվ աշակերտներ, նրանց հանձնարարել նույն առաջադրանքը և ասել, որ խումբը պետք է գործի միասնական, իսկ նրանց կատարած աշխատանքն արժանանալու է մեկ գնահատականի: Այս ձևով ուսուցիչն աշակերտների մեջ կձևավորի թիմային մտածելակերպ, կտա միմյանց հետ հաղորդակցվելու հնարավորություն և դասարանում կձևավորի մեկը բոլորի, բոլորը մեկի համար սկզբունքը:

Ուսումնառության գործընթացում ուսումնական և գործունեության մյուս տեսակների միջոցով աստիճանաբար ձևավորվում են կրտսեր դպրոցականի անձնային որակները, որոնք շարունակում են զարգանալ նաև հետագայում: Այս տարիքի երեխաններն ամբողջությամբ ընդունում են մեծահասակի հեղինակությունը և անվերապահորեն հավատում նրա գնահատականին: Այս տարիքի երեխաններն առանձնապես հակված չեն մտածելու դժվարությունների և բարդությունների մասին, ուստի կարևոր է նրանց կողմից հաջողության հասնելու գիտակցված նպատակադրումը և ուսուցչի կողմից դրա արժևորումը: Ինչքան շատ երեխային ոգևորես, ցույց տաս նրա ուժեղ կողմերը, փորձես ուղղել առկա բացթողումները, այնքան նա հետագայում կկարողանա բաց լինել հասարակության առաջ, ունենալ սեփական կարծիք և չվախենալ այն արտահայտելուց:

Կրտսեր դպրոցականների ևս մեկ առանձնահատկությունն կա, որը հնարավորություն է տալիս ավելի լավ լուծել հաղորդակցման կարողությունների ձևավորման խնդիրը, որը միջոց է նրանց սոցիալական ադապտացիան իրականացնելու համար: Երեխաները չեն կորցրել իրենց հետաքրքրությունը խաղի նկատմամբ, և դա հնարավորություն է տալիս ուսուցչման գործընթացը կազմակերպել յուրօրինակ և հետաքրքիր: Խաղը կարելի է նաև օգտագործել ինչպես հաղորդակցական կարողությունների ձևավորման, այնպես էլ ճիշտ սոցիալական վարք ձևավորելու համար: Ուսուցիչը կարող է այդ ամենը կազմակերպել խաղերի միջոցով, որոնք կօգնեն առկա գիտելիքներն ամրապնդել և հաղորդակցական կարողություններ ձևավորել ինչպես դասերի ժամանակ, այնպես էլ դրանից դուրս:

---

<sup>5</sup> Подласый. И. Педагогика: общие основы. Процесс обучения. М., 2000, 111с

Օրինակ՝ ֆիզկուլտուրայի դասաժամին աշակերտներին բաժանել երկու թմի և յուրաքանչյուրին սահմանված ժամանակով հանձնարարություն տալ, որի ժամանակ թիմերից մեկական մասնակիցներ պետք է մոտենան և հնարավորինս արագ կատարեն տվյալ վարժությունը: Այս խաղի ժամանակ թիմակիցները պետք է ոգևորեն և երկրպագեն նրանց, իրենց խոսքերով առաջ մղեն խաղի մասնակցներին, որն էլ խաղում կբերի հաղթանակի: Այս միջոցով աշակերտների մոտ կստեղծվի ակտիվ և անմիջական մթնոլորտ և որպես խրախուսանք հաղթող թիմը կպարգևատրվի նվերներով: Այս մեթոդի միջոցով և՛ դասը հետաքրքիր կանցնի, և՛ նույնիսկ ամենալռակյաց աշակերտն այդ ոգևորության ալիքի ներքո կլինի իր թիմակիցների կողքին և կցանկանա վայելել հաղթանակի բերկրանքը:

Եթե քիչ են խրախուսում երեխայի հաջողությունները և ավելի շատ պատժում են նրան անհաջողությունների համար, ապա նրա մեջ ձևավորվում և ամրապնդվում է անհաջողություններից խուսափելու դրդապատճառը, իսկ հակառակ դեպքում ձևավորվում է հաջողություններին հասնելու դրդապատճառը: Հետազոտությունները ցույց են տալիս, որ կրտսեր դպրոցականի պատկերացումներն «ինքն իր մասին» սերտորեն կապված են սեփական անձի նկատմամբ վերաբերմունքի, այսինքն՝ ինքնագնահատականի հետ: Երեխայի ինքնագնահատականի հարցում կարևոր է նաև ուսուցչի դերը և նրա հետ փոխհարաբերվելու ուղիները:

Ներկայիս ժամանակներում հաղորդակցման դերն ավելի է կարևորվում, քանզի հենց այդ տարիքից երեխաները սկսում են օգտվել համացանցից, իրենց ժամանակի մեծ մասն անցկացնում են օնլայն հարթակում և սկսում են ապրել վիրտուալ կյանքով: Սա բավականին մեծ չարիք է՝ մասնավորապես այն պարագայում, երբ ծնողները պարզապես չուզենալով երեխաներին նեղացնել, նրանց թույլ են տալիս սահմանված ժամանակից շատ օգտվել համացանցից և շատ դեպքերում առանց ծնողների իմացության երեխաները ներգրավվում են այնպիսի խաղերի մեջ, որոնք գուցե նաև ազդեն նրանց կյանքի որակի վրա: Հենց դպրոցը, ուսուցիչը և դասընկերներն են, որ կարող են այդ աշակերտներին զերծ պահել վիրտուալ դաշտ մտնելու գաղափարից, պետք է դեռ կրտսեր

դպրոցական տարիքից զրույցներ ունենալ երեխաների հետ, նրանց բացատրել մարդկանց հետ իրական շփման անհրաժեշտությունը, օնլայն հարթակի բերած վտանգավոր հետևանքները: Նմանատիպ զրույցներ պետք է լինեն նաև երեխաների ծնողների հետ, քանզի դպրոցից դուրս սովյալ երեխայի վարքին և սովորույթներին պետք է հետևի ծնողը: Ճիշտ և համակարգված գործելու պարագայում կարելի է հասնել ցանկալի արդյունքի և երեխաներին հետ պահել սխալ ճանապարհից:

Այս ամենի հետ մեկտեղ քիչ չեն նաև այն երեխաները, որոնց ընտանիքներում մինչև որոշակի տարիքի հասնելը չի թույլատրվում համացանց մուտք գործելը, նրանք կենտրոնացած են դպրոցում իրենց դասերի վրա և ծնողների ու ուսուցիչների օգնությամբ կարողանում են և՛ ճիշտ մարդկային արժեքներ յուրացնել, և՛ իրենց տրված ինֆորմացիան հեշտությամբ կլանել:

Ցանկացած պարագայում ինչպիսի նախասիրություններ էլ ունենա աշակերտը, ուսուցիչը պարտավոր է բոլորին հավասար վերաբերմունք ցույց տալ, իր գիտելիքները փոխանցել հետաքրքիր ու ժամանակակից մեթոդներով և աշակերտների համար հարթել կյանքի ճիշտ ուղի:

Կրտսեր դպրոցականի հետ աշխատելիս բարոյական նորմի պահպանումը պետք է առաջնային լինի, դեռ դպրոցական տարիքից երեխաները շփվելով իրենց հասակակիցների հետ ձեռք են բերում մի շարք առանձնահատուկ բնավորության գեծր, որոնք հետագայում ուղեկցում են նրանց ողջ կյանքի ընթացքում և հնարավորություն են տալիս հասարակության մեջ պահել իրենց դիմագիծը:

Այսպիսով՝ կրտսեր դպրոցական տարիքում դրվում է բարոյական վարքի հիմքը, յուրացվում են բարոյական նորմերը և վարքի կանոնները, ձևավորվում է անձնավորության հասարակական ուղղվածությունը: Բարոյական գիտելիքները, պատկերացումները և դատողությունները տարիքի վերջում նկատելիորեն հարստանում են, դառնում ավելի գիտակցված, բազմակողմանի ու ընդհանրացված<sup>6</sup>:

---

<sup>6</sup> Թունյան Ջ.Ե. Երիցյան Լ.Ս «Կրտսեր դպրոցականի հոգեբանություն», Երևան, 2013թ, 106 էջ

## Եզրակացություն

Կրտսեր դպրոցական տարիքը համարվում է ուսումնական գործունեության առավել պատասխանատու փուլ, ուստի այստեղ առավել կարևորվում է ուսուցչի ճիշտ հաղորդակցումն աշակերտների հետ, նրանց բնավորության առանձնահատկությունների ուսումնասիրումն ու շրջապատում նրանց դիրքի ամրապնդումը: Այս տարիքում կարևորվում է նոր գիտելիքների, ունակությունների և հմտությունների ձեռքբերումը, հասակակիցների և ուսուցչի հետ հաղորդակցման դերի նշանակությունը և դրա կիրառումն առօրյա կյանքում: Կրտսեր դպրոցական տարիքում հաղորդակցումը նաև մեծ ազդեցություն ունի աշակերտների ինքնագնահատականի, ինքնահաստատման, սեփական «ես»-ի գիտակցման գործում:

Կրտսեր դպրոցական տարիքում ձևավորվող և զարգացող հաղորդակցական ունակությունների վերաբերյալ առկա տեսական և գործնական մոտեցումների ուսումնասիրությունը ցույց տվեց, որ այդ հաղորդակցական ունակությունների ձևավորման աստիճանն ազդում է ոչ միայն երեխաների կրթության արդյունավետության վրա, այլ նաև նրանց սոցիալականացման և անձի ամբողջական զարգացման վրա: Ուսուցչի կիրառած մեթոդները, խմբային աշխատանքները, թիմային մտածելակերպի ձևավորումն օգնում է աշակերտներին դասարանի մի մասնիկը լինել, ազատ և անկաշկանդ շփվել հասակակիցների հետ, կարողանալ վերցնել անհրաժեշտ տեղեկատվություն և այն հետագայում կիրառել կյանքում:

Կարևոր է նաև այն փաստը, որ հաղորդակցման և շփման միջոցով աշակերտները հնարավորինս զերծ են մնում վիրտուալ կյանքից, դրանից բխող վտանգներից և վատ սովորույթներից: Այս ամենի ճանապարհին երեխային պետք է ճիշտ խորհրդատու և այդ առաքելությունն ուսուցչին է:

Շատ կարևոր է, որ ուսուցիչն ինքը ուսումնասիրած և բացահայտած լինի այն խոչընդոտները, որոնք հնարավոր է հանդիպեն երեխային դեռ

կրտսեր դպրոցական տարիքից, և հենց ձեռք բերած գիտելիքների շնորհիվ էլ ուսուցիչը կկարողանա նրանց ճիշտ ուղիւ վրա դնել, նրանց մեջ սերմանել այն արժեքները, որոնք կյանքում կարևոր են և որոնք նրանց հնարավորություն կտան կյանքում առաջ ընթանալ:

Այսպիսով կրտսեր դպրոցականի կյանքի ուղին սկսում է զարգանալ հենց դպրոցից և այստեղ ստացած յուրաքանչյուր գիտելիքը և լսած յուրաքանչյուր խոսքը նրանց համար կարող է որոշիչ լինել:

## **Օգտագործված գրականության ցանկ**

1. Ասատրյան Չ. «Տարրական կրթություն մանկավարժություն», Երևան, 2011թ, էջ 35
2. Թունյան Չ.Ե. Երիցյան Լ.Մ «Կրտսեր դպրոցականի հոգեբանություն», Երևան, 2013թ, 106 էջ
3. Խուղդյան Ս. Ս. «Անձի զարգացման ճգնաժամային տարիքները»- Երևան: Չանգակ – 97, 2004, 43 էջ
4. Гонина О.О. «Психология младшего школьного возраста», Москва, 2020
5. Коноваленко, М. Ю. Теория коммуникации: учебник для бакалавров, Москва, 2023
6. Подласый. И. Педagogика: общие основы. Процесс обучения. М., 2000, 111с